

Broj: 03-34-111-1/20  
Mostar, 14.01.2020. godine

**BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Sekretar  
Hamdije Kreševljakovića 3  
71000 Sarajevo**

Bosna i Hercegovina  
Federacija Bosne i Hercegovine  
**PARLAMENT FEDERACIJE  
SARAJEVO**

Primljeno: 16 -01- 2020			
Org. jed.	Broj	Priloga	Vrijednost
05/2	-02-	290	/19

**PREDMET: Odgovor na delegatsko pitanje koje je na 4. sjednici Doma naroda  
Parlamenta Federacije Bosne i Hercegovine postavio delegat  
Damir Marjanović, dostavlja se**

Poštovani,

Federalno ministarstvo obrazovanja i nauke zaprimilo je Vaš akt broj 05/2-02-290/19 od 27.12.2019. godine, kojim ste nam na postupanje dostavili delegatsko pitanje (izvod iz neautoriziranog magnetofonskog snimka) upućeno federalnoj ministrici obrazovanja i nauke koje je na 4. sjednici Doma naroda Parlamenta Federacije Bosne i Hercegovine, održanoj 19.12.2019. godine, postavio delegat Damir Marjanović, i koje glasi:

„... Prije neki dan sam na sredstvima javnog informiranja vidio njenu izjavu koja se tiče PISA testiranja gdje je izrazila veliku zabrinutost i najavila veliku aktivnost po pitanju svega toga, pa bih postavio pitanje šta je Federalno ministarstvo obrazovanja i nauke poduzelo po pitanju analize rezultata PISA testiranja ako ništa na nivou Federacije i definitivno bih dao inicijativu da se u što skorije vrijeme, a najkasnije do kraja siječnja organizira sastanak svih kantonalnih ministara pod pokroviteljstvom Federalnog ministarstva obrazovanja gdje bi se analizirali dostupni rezultati i napravile sugestije, prijedlozi, aktivnosti u budućem periodu da se za tri godine opet ne bi zgrozili nad rezultatima testiranja naših dječaka i djevojčica od 15 godina. Zahvaljujem“.

U vezi Vašeg pitanja, obavještavamo Vas da je dana 24.12.2019. godine u Mostaru, pod predsjedanjem federalne ministrice obrazovanja i nauke prof.dr. Elvire Dilberović, održana tematska sjednica Koordinacije ministara obrazovanja i nauke u Federaciji BiH, posvećena rezultatima PISA istraživanja. Poziv za učešće na ovoj sjednici upućen je svim kantonalnim ministrima obrazovanja, kako članovima Koordinacije ministara obrazovanja i nauke u Federaciji BiH, tako i onima koji to nisu. Sjednici su prisustvovali ministri iz Tuzlanskog i Hercegovačko-neretvanskog kantona te predstavnici ministarstava obrazovanja iz Zeničko-dobojskog, Bosansko-podrinjskog i Kantona Sarajevo, kao i predstavnici OSCE-a.

Prisutni ministri/predstavnici ministarstava obrazovanja u Federaciji BiH na ovoj su sjednici donijeli niz zaključaka te preporučili ministarstvima obrazovanja da, zajedno sa pedagoškim zavodima, rade na razvoju i inoviranju programa stručnog usavršavanja direktora škola, nastavnika i stručnih saradnika u školama kako bi se podigao kvalitet nastavnog procesa i uvele savremene metode odgojno-obrazovnog rada sa učenicima koje se više fokusiraju na razvoj kritičkog mišljenja, rješavanja problema i općenito funkcionalnih znanja i vještina kod učenika. Također, u budućem djelovanju pažnju je potrebno usmjeriti na promjene i inoviranje inicijalnog obrazovanja nastavnika.

Neki od zaključaka su da predstavnici ministarstava obrazovanja u Federaciji BiH trebaju uzeti aktivno učešće u radu Radne grupe za izradu Akcionog plana za implementaciju Zajedničke jezgre nastavnih planova i programa definirane na ishodima učenja, te aktivno i u sinergiji raditi na implementaciji Akcionog plana na način da se nastavni planovi i programi u kantonima u FBiH što više međusobno usklade. U nastavi jezika, matematike i prirodnih nauka, kao materijale za vježbanje, koristiti dostupne zadatke iz PISA i TIMSS istraživanja, a potrebno je i inovirati metode procjene učeničkih postignuća. Za realizaciju spomenutih zaključaka predlaže se povećanje izdvajanja za obrazovanje u budžetima za naredne godine, a kako bi se, prije svega, poboljšala postignuća učenika te unaprijedio nastavni proces.

Preporuke i zaključci sa sjednice dostavljeni su predsjedavajućima kantonalnih skupština u FBiH te odborima za obrazovanje Predstavničkog i Doma naroda Parlamenta FBiH, kao i pedagoškim/nastavničkim fakultetima, a kako bi se sinhronizirano proveli u narednom periodu.

S poštovanjem,



MINISTRICA

*Elvira Dilberović*  
prof. dr. Elvira Dilberović

Dostavljeno:

- Naslovu
- Damir Marjanović, delegat u Domu naroda Parlamenta Federacije BiH, adresa: Hamdije Kreševljakovića br. 3, 71000 Sarajevo
- a/a